

Hebreos

**Bèngbe Bètsá béngaftaca
tojoyebuambá, chabe Uaquiñáftaca**

1 ¹Tempo, Bèngbe Bètsá ba soye y ba soyéngaca bèngbe bèts taitángbioye tojanéyana, chë chabe juabna oyebuambnayéngaftaca. ²Pero quem tempo béngaftaca tojoyebuambá, chabe Uaquiñá jíchmuase, béngbioye cha chašúyanama. Bèngbe Bètsá tojama, lempe ntšamo chabe soye yomncá, chabe Uaquiñabiama chaotsemnama, y chábeyeca Bèngbe Bètsá quem luare y nyetsca inyë luarénga tojama. ³Cha endinýanýná Bèngbe Bètsabe corente buashinýinýanana y uámanana, y cha endmëna cach Bèngbe Bètsacá, y chábeñe bënga mondobena jinýama ntšamo Bèngbe Bètsá yomncá. Chabe bèts obenánaca endútabna lempe ntšamo quem luarentše yobinýncá; cha tojayana y chca jtsemnana. Cha tojanóbana bèngbe bacna soyénga jabuajuánama, y chentsana Bèngbe Bètsá tojaninýanyé cha puerte bètsá y uamaná bétsemnama, celoca játbemëse, Bèngbe Bètsabe catšbioica, nyetscanga jtsaméndayama.

**Bèngbe Bètsabe Uaquiñá chë
angeléngbiama más bètsá yomna**

⁴Y chca, Bèngbe Bètsá tbojánbema chë angeléngbiama más uamaná y obená, er Bèngbe Bètsá tbojanbuajó

canýe más uámana uabaina y chë angeléngbiama canýe más uámana trabajo tbojanbonýé. ⁵Ndegombre chca endmëna, er Bèngbe Bètsá ndocna te ndocna ángelbioye mëntšá tbonjaniyana, ntšamo chabe Uaquiñábioye tbojaniyancá:

Aca atšbe Uaquiñá condmëna.

Mënté entsanga sënjinýanyé aca atšbe Uaquiñá comnama ca.

Ni ndocna angelbiama mëntšá tojánayana, ntšamo chabe Uaquiñabiama tojanayancá:

Atše canýe taitá chabiama chántsemna,

y cha canýe Uaquiñá atšbiama ca.

⁶Quem Bèngbe Bètsabe Uaquiñá endmëna nyetscangbiama más uamaná. Chca Bèngbe Bètsá tojánayana, chabe natsana Uaquiñá quem luaroye cháúashjanguama cha tojanma ora:

Bèngbe Bètsabe nyetsca angelénga cha chamotsatschuaná ca.

⁷Y chabe angeléngbiama, mëntšá tojánayana:

Atše sëndama atšbe angelénga, chë atšbe buayinayénga, mo binýiëngcá chamotsemnana, y chënga, atšbe oservénënga, mo inëjëngcá ca.

⁸Pero chabe Uaquiñabiama Bèngbe Bètsá tojánayana:

Utabná, acbe améndayana nyetsca tescama echántsemna,

y aca nyetsca soyënguiñe
condbétsemandaye, ntšamo
tšabá yomncá jtsamëse.

⁹ Aca icontšena ntšamo tšabá
yomncá nyetsca soyënguiñe
jtsamama, y sempre chca
jtsamama tša icoboše,
pero nŷa tondayama

cmondogustana bacna soyënga
jtsamana, chë ndayá Bëngbe
Bëtsá ndoñe yondboše soye;
chíyeca Bëngbe Bëtsá
tcmojabocacá,

y tojama aca puerta oyejuayá
chacotsemnama,

chë ínŷengbiamá más oyejuayá ca
—Bëngbe Bëtsá tojánayana.

¹⁰ Bëngbe Bëtsá mëntšánaca chabiamá
tojánayana:

Utabná, quem luare jobojátšama
ora, aca quem luare tconjanma,
y lempe chë celoca yomna
soyëngnaca.

¹¹ Lempe chë soyënga nyets tempo
ndoñe queochátsmëna;
aca nyetsca tescama
cochántsemna.

Lempe chë soyënga
echanjopochóca, mo
tojuatanguaná entšayacá.

¹² Aca chë luarënga cochanjátrocaye,
mo tsmëcá cuafjabiamcá.
Chca, chë luarëngaca cochanjama,
mo entšayá tcojtenëjonëtse y
tcojenotrocacá.

Pero aca nyets tempo cach aca
cochandesomñe,
y nyets tempo vida
cochandesóbomñe ca —cha
tojánayana.

¹³ Bëngbe Bëtsá ndocna te ndocna
ángelbioye mëntšá tbonjaniyana,
ntšamo chabe Uaquiñábioye
tbojaniyancá:

Atšbe catšbioica cochtsetbemana,

acbe uayayënga acbe cucuatšinë
chamoquedama atšbe
obenánaca chjamëntscuana ca.

¹⁴ Ndegombre, nyetsca angelënga
espíritënga mond mëna Bëngbe Bëtsá
jaserviama, ndëmuanŷenga cha
tojanichamó bënga jabújabuachama,
chë atsebácanënga mochtsemnëngbe
tšabiamá.

**Canŷe bëts soye endmëna
atsebácanënga jtsemnana**

2 ¹ Chíyeca, bënga šontsamna
sempre Bëngbe Bëtsabe soyënga
jtsuananana, chë bënga tmonjuena
soyënga, chë tšabe benachentšana
ndoñe chamondujánama. ² Ndayá
Bëngbe Bëtsá tempo angelëngaca
entšanga tojanamëndacá, canŷe
ndegombre soye endmëna, y entšanga
entsamna chca jtsobedecënaná; y chë
bacna soye tmojanmënga y ntšamo
Bëngbe Bëtsá tojanmandacá ndoñe
tmonjanmënga castigo tojanatšatá,
chca tmojanma causa; y chca, ³ bënga
chca bacna soyënga tmojtsemëse,
čntšamo mochjobenaye jtsejuabnayana
Bëngbe Bëtsá chama ndoñe
šochanjacastígaye ca? Ndegombre
cha chca echanjama, bënga chábeñe
ndoñe tmontsošbuáchese, chë bëts
soye jëftsashjáchama, atsebácanënga
jtsemnana. Bëngbe Utabná chë
natsaná yojtsemna nda entšanga
tojanabuayená Bëngbe Bëtsá entšanga
yochjánatsebacama; y ínŷenga
bënga šonjanabuayená cachcá
ntšamo chábioye tmojanoyeunacá.
⁴ Y Bëngbe Bëtsánaca tonjaninŷanjé,
ndayá chënga tmojanabuayenacá
ndegombre bëtsemnana, chabe
obenana jinŷanŷiyama soyëngaca,
entšanga chamenjnaná soyëngaca, bëts
soyëngaca, y entšanga chë Uámana
Espíritu ainaniñe chamotsebmnama

cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

Bëngbe Bëtsá tojanma Jesucristo entšangcá chaotsemnama

⁵ Bëngbe Bëtsá angelënga ndoñe tonjubuáyana chamotsemándama ndayá quem luarentše yochtsemniñe, lempe mo tsmëcá chaotsemnama Bëngbe Bëtsá chaojama ora, chë ndayama mora bënga montsoyebuambná. ⁶ Chamna, ínÿoca Bëngbe Bëtsabe uabemana palabrënguiñe mëntsá endayana, ntšamo chábioye canÿa tbojaniancá tojánayana:

Entšanga ndoñe yapa uámanënga quemátsmëna, as ¿ndáyeca tša chëngbeñe cuanjësejuabnaye? Chënga entšanga mondmëna. ¿Ndáyeca tša chënga cuanjësanÿena?

⁷ Aca tcojama entšá puerte uamaná chaotsemnama, y chë angelëngna nÿe batsatema chabiamá más uámanënga mondmëna.

Aca tcojama cha puerte uamaná y respeto merecido bomná chaotsemnama,

⁸ y cha chaotsemándama nÿetsca chë inÿe soyënguiñe, chë quem luarentše aca tcojamiñe —chiñe canÿa tojánayana.

Entšá lempe chaotsemándama Bëngbe Bëtsá tojanma ora, tondaye tonjánboshjona entšáftaca ndëmandana soye ca. Pero mëntscoñama ndoñe nÿa chca quemëntinÿe, chë entšá lempe ntšamo quem luarentše yomncá jtsemándayana. ⁹ Pero bënga mondëtatšëmbo y corente mondonÿá Jesús aññe chca tojanmama. Bëngbe Bëtsá tojanma cha nduamaná

chaotsemnama, mo canÿe entšacá, baseftayté chë angelëngbiamá más batšá uamaná. Bëngbe Bëtsá, entšangbe tšabiamá jtsejuabnaye, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nÿets luarentša entšangbe tšabiamá. Y Jesús ya chca tojánmayeca, Bëngbe Bëtsá ya tojinÿanÿe cha puerte bëtsá y uamaná bëtsemnama.

¹⁰ Nÿetsca soyënga yobinÿna Bëngbe Bëtsabiamá y chábeyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entšanga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entšanga atsebácanënga jtsemnama unachayá, chaosufrima jamëse, chca, ba entšanga celoca, mo chabe basengcá, cháftaca bëtšétsanga chamotsemnama. ¹¹ Er Bëngbe Bëtsá cach Taitá nÿetscangbiamá endmëna: Jesús, chë entšanga Bëngbe Bëtsábenga chamotsemnama iuamabiamá, y chë entšanga chca chamojtsemnëngbiámnaca. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama. ¹² Bëngbe Bëtsabe uabemana palabrënguiñe Bëngbe Bëtsábioye cha mëntsá tbojaniancá:

Atšbe uabentséngbeñe acbiamá chanjóyebuambaye, y jacántase cbochanjëtshuaye, ácbioye adórayënguentše ca.

¹³ Y mëntsánaca cha Bëngbe Bëtsabiamá tojánayana:

Atše atšbe Bëtsábeñe chantsošbuáchiye ca.

Y más chcoye mëntsá tojánayana: Muentše Bëngbe Bëtsabe básengaftaca séntsemna,

chê atšbe cucuatšîne
tojâbashejuanênga, atše
jtsanÿenama ca.

¹⁴ Quem Bêngbe Bêtsabe básenga nÿetsca entšangcá mondménayeca, Jesúsna canÿe entšá chêngcá tojanóbema. Cha chca tojanma, jóbanêse, chê entšanga jóbanama chaotsamna obenana bomná Satanás, jayénjanama. ¹⁵ Y chca, cha tojama chê jóbanama y ndayá chentšana yochjopásama auatjênga ndoñe chamondétsauatjama; chênga nÿets tempo corente ngménaca innoyena, jóbanama auatja causa. ¹⁶ Er ndegombre, cha ndoñe tonjánabo chê angelênga jabújabuachama, ndayá chê Abrahábentsana entšángbioye. ¹⁷ Y chama cha ibojamna jtsemnana nÿetsca soyênguiñe cachcá mo chabe uabentsêngcá, chê entšanga, chca, jobenayama jtsemnana chêngbiana mo bachnangbe canÿe más uámana amëndayacá, Bêngbe Bêtsá jtseimpadánama chêngbioye chêngbe bacna soyêngama cháuaperdonama, puete lastemado mêná y sempre ntšamo Bêngbe Bêtsá tbojayancá amá. Chca, cha jóbanêse jamama entšanga chamobenama perdonánênga jtsemnana, y chca, jobenayama Bêngbe Bêtsáftaca tšabá tempcá jtsemnêngama. ¹⁸ Y mora cha entsobena, ndêmuanÿenga bacna soye jamama tojócochenguênga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentsêna ora.

**Cristo Moisesbiana más
uamaná endmêna**

3 ¹ Chíyeca, Jesucristbeyeca
catšátanga, Bêngbe
Bêtsábenga, ndêmuanÿenga

Bêngbe Bêtsá tojáchembo chabe entšanga chamotsemnana, corente Jesucristbeñe šmochjésejuabnaye. Cha endmêna nda Bêngbe Bêtsá bêngbioye tbojanichmó, y nda bêngbiana yomna mo chê más uámana bachnangbe amëndayacá, Bêngbe Bêtsábioye jtseimpadánama bacna soyêngama chašotsaperdonama. Cha chca endmêna chê bênga mondošbuaché soyênguiñe y chê mondbáyana ndegombre yomna ca soyênguiñe. ² Er Jesús nÿets tempo tojanma ndayá chaotsamama Bêngbe Bêtsá tbojaniancá, Bêngbe Bêtsá, nda tbojanábuayana chca chaoservema, cachcá ntšamo Moisés tojanma ntšamo Bêngbe Bêtsá tbojanmandacá, chabe entšángbioye cháuaservema. ³ Canÿe yebna jebuaná chê yebnama más uamaná jtsemnana; cachcá Jesús, nda inétsama entšanga Bêngbe Bêtsábenga chamotsemnana, más jtsoмерecénana Bêngbe Bêtsá cha puete bêtsá y uamaná bêtsemnana cháuinÿanÿema, nÿe ntšamo Moisés, canÿa Bêngbe Bêtsabe entšanguentšá yojanomerecénama. ⁴ Ndêmuanÿe yébnênaca canÿe jebuaná jtsebomnana, pero Bêngbe Bêtsá endmêna nda tojanma lempe ntšamo yobinÿncá. ⁵ Moisés yojtsama ndayá chaotsamama Bêngbe Bêtsá tbojanmandacá, tšabe oservenacá nÿetsca Bêngbe Bêtsabe entšángbeñe, y yojamna canÿa corente tatsêmbuá ndayá más chcoye yochjanopásama, ndayá Bêngbe Bêtsá yochjánayanama. ⁶ Pero Cristo, ndayá Bêngbe Bêtsá tobošcá jamana, chê Bêngbe Bêtsabe entšángbeñe Uaquiñacá jtsemándayêse, ntšamo canÿe uaquiñá jtsemándayana ndayá nÿetsca chabe pamíllanga tmojtsamiñe; cha, chê Uaquiñacá y chênga chê Bêngbe Bêtsabe pamillentsêngcá.

Bënga chë pamillentša entsànga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiama yochjamama tmojtsobátmanëse, y bënga chca jtsebomnama puerte oyejuayënga tmojtsemnëse.

**Chë jóchnama uámana luare
Bëngbe Bëtsabe entsàngbiama**

⁷Chcasna, ntšamo chë Uámana Espíritu Bëngbe Bëtsabe uabemana palabrénguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

⁸ ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama, mo chë entsànga ndoyena luaroca Moisésoftaca imojéftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinýama ntsachetšá más muanjobenaye jamana y Bëngbe Bëtsá cabá uantado chëngaftaca tajojtssemnana.

⁹ Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinýama ndayéntscoñe atše uantado chëngaftaca tsjamnama; chca chënga tmonjanma, masque canta bnétsana uatëntscuana chënga chentše tmonjáninye chë atše sënjánama bëts soyënga.

¹⁰ Chíyeca, atše chorsca entsàngaftaca šonjánetna y sënjánayana:

“Tšëngaftanga mora átšeftaca ndoñe quešmátajna, mo chë otšenënga tmojtsemnëngcá,

y ndoñe šmonjábošena jtsiyenana ntšamo atše tšbošcá jtsamëse.’

¹¹ Chíyeca, atše chëngaftaca etonaná sënjánayana, mo nda cuafjajuracá, chënga ndocna te mochjéftsashjache chë átšeftaca jóchnama uámana luaroye jashjanguama ca” —cha tojánayana.

¹² Jesucrístbeyeca catsátanga, yejuana šmochtsantješna ndocná tšëngaftanguentsá chaondétsébomna canye ainana bëtscá bacna juabnéngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe.

¹³ Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrénguiñe “mënté ca” uabaina tempo. Chca cmontsamna, ndocná tšëngaftanguentsá chaondétsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnéngaca ingñená. ¹⁴Er, ndayá Jesús chabe améndayoca yobomnentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bétsemnana, ntšamo bënga chábeñe jtsošbuáchiyama tmonjanontsé ora monjanamcá.

¹⁵Ntšamo Bëngbe Bëtsabe uabemana palabrénguiñe endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entšanga ndoyena luaroca
Moisésoftaca imojéftsemnëngcá,
Bëngbe Bëtsabe contra nyetsca
soyënguiñe imojtsemna ca.

¹⁶ ¿Y ndëmuanýenga imojamna,
chë Bëngbe Bëtsá tojanéyancá
tmojanuenentsana, nyetsca
soyënguiñe chabe contra
imojtsanmëna? Co chë Moisésbeyeca
Egiptocana tmojánbocanënga. ¹⁷ ¿Y
ndëmuanýengaftaca Bëngbe Bëtsá
etonaná canta bnëtsana uatëntscuana
yojtsemna? Co chë bacna soyënga
tmojanmëngaftaca, ndëmuanýenga
entsanga ndoyena luaroca
tmojanóbana y chëngbe cuerpo chentše
tojanoqueadá. ¹⁸ ¿Y ndëmuanýenga
tojanéyana, mo nda cuafjajuracá,
chënga ndocna te mochjéftsanashjache
chë cháftaca jóchnama uámana
luaroye jashjanguama ca? Co
chë ndëmuanýenga ntšamo
cha tojanmandacá ndoñe
tmonjanmënga. ¹⁹ Y ndegombre,
bënga montsobena jinýama chënga
ndoñe tmonjéftsanashjache chë
cháftaca jóchnama uámana luaroye
jashjanguama, Bëngbe Bëtsábeñe
ndoñe imontsošbuaché causa.

4 ¹ Chíyeca, bënga chë Bëngbe
Bëtsáftaca jóchnama
uámana luare jashjáchama cabá
imobenëntscuana, ntšamo cha
šojanašebuachenacá cachcá
mëntscoñama iutésemna, puerte
cuedado mochtsebomna, nderado
ndánaca tšëngaftanguentsá ndoñe
nanjobenaye chca jashjáchama.
² Er bëgnaca chë tšabe noticiënga
tmonjouena, cachcá chë Bëngbe
Bëtsabe buayenana soyënga chëngbe
ainaniñe ndoñe chaondómashënguama
tmojanmëngcá; pero chënga chë
buayenana soyënga tmojanuena
ora, ndocna tšabe soye chëngbeñe

tonjanopasá, er chca tmojanuena
ora, chë palabrënguiñe ndoñe
montsanošbuaché. ³ Pero bënga, chë
Jesucristbeñe tmojošbuachengna,
mochanjobenaye chë jóchnama
uámana luaroye jashjanguama,
chë ndayama Bëngbe Bëtsá
tojánayana, chë tempo chábioye chca
tmojtsanábotengbiama cha mëntšá
tojánayana ora:

Chíyeca, atše chëngaftaca
etonaná, sënjánayana mo nda
cuafjajuracá,
ndegombre chënga ndoñe
mochjéftsashjache chë jóchnama
uámana luaroye jashjanguama
ca.

Pero cha chabe trabajo tojanpochocá,
quem luare tojanma ora; ⁴ er Bëngbe
Bëtsabe uabemana palabrënguiñe
cányëntše mëntšá endayana, chë
cányšëfta tianoye ndayá cha
tojanmama:

Bëngbe Bëtsá nyetsca
trabajëngama tonjanochná chë
cányšëfta tianoye ca.

⁵ Y cachentše Bëngbe Bëtsabe
uabemana palabrënguiñe
endayana, chë tempo chábioye chca
tmojtsanábotengbiama:

Chënga ndocna te
quemocháisashjache chë
átšëftaca jóchnama uámana
luaroye jashjanguama ca.

⁶ Chë entšanga monjamna chë
natsanënga chë tšabe noticiënga
jouenama, pero chë Bëngbe Bëtsáftaca
jóchnama uámana luare ndoñe
tmonjéftsashjache, ntšamo cha
inabošcá chënga ndoñe tmonjanma
causa. Chcasna, cabá ndegombre
endëtsomñe báseftanga, chë Bëngbe
Bëtsá tojánayana soyënguiñe
tmojtsošbuáchengna, mochjéftsashjache
chë Bëngbe Bëtsáftaca jóchnama

uámana luaroye jashjanguama. ⁷Chê entšanga ndoyena luaroca, Bëngbe Bëtsá entšanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canye tempo tojuinýnaná, chora entšanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrenguine mëntšá tojánayana ora:

Mënté tšëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

⁸ Josué, Israeloca entšanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnana cha choca matënjanmëse, Bëngbe Bëtsá bayté chentšana, David yojëftsiyena ora, inye tempuama ndoñe matënjanoyebuambá, chë ndaye ora entšanga muanjobenaye chë cháftaca jóchnama uámana luare jashjáchama. ⁹Y chca, cabá endmëna canye uámana luare ndayentšë Bëngbe Bëtsabe entšanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora; ¹⁰er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora. ¹¹Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye

ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjëftsashjache.

¹²Er Bëngbe Bëtsabe palabra endmëna mo canye aina soyca, nyets tempo entšángbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efsana espadëjaquécá, jobenayana puerte jashenoye jatëtsana canye cuerpo tcojatëtse ora, cachcá y cabá puerte más Bëngbe Bëtsabe palábraca, cha bënga jinýanýiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinýinyé sóynaca; y chë palábraca cha endobena jáuyanana ntšamo bënga tmojajuabó y tmojabošencá añe o ndoñe tšabá bëtsemnana. ¹³Ntšamo Bëngbe Bëtsá tojamentšana tondaye quenátopodena chabiama iytëmenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiama lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

Jesús endmëna chë más uámana bachnangbe bëts amëndayá

¹⁴Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiama ibuëtseimpadana, mo chë bachnangbe canye más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entšángbeñe tmojayana. ¹⁵Er chë bëngbiama impadaná, mo bachnangbe canye

más uámana bēngbe amēndayacá, Jesús, yobena bēngbiama jóngmiana, bēnga inye ora ndoñe yapa obenana tmtotsebmoma ora, tšabe soye o ndaye sóynaca jamama. Chca endmēna, er Satanás tša yojtšentšena Jesúsbioye ba juabnēnga chabotsontšáshjajuanama, jayēnjanama bacna soye chaomama, nyetsca juabnēnga ntšamo bēngnaca mondbetsebmocná, pero Jesús ndocna te ndocna bacna soye tonjéftsema. ¹⁶ As, ndauatjca Bēngbe Bētsá mochjótšēmbona, mo chábioye cuaftsobecocnangcá; cha canye uámana tbemaniñe yojtsetbemana canye bēts reycá; chca mochjama, bēnga chášualastemama, y bēngbiama tšabe juabna jtsebmone, chašújabuachama bēnga chca chašojtséjaboto ora.

5 ¹ Ndēmuanye bachnangbe más uámana amēndayánaca jtsemnana entšanguentšana bocacaná, y uabuayaná chēngbe cuenta Bēngbe Bētsá jaserviama, chábioye juatšēmbonama y bayēnga jobáyama Bēngbe Bētsá jētschuayama, chca, Bēngbe Bētsá chē bacna soyēnga entšanga tmojamama cháuperdonama. ² Chē bachna jtsobenana jóngmiana, chē bacna soyēnga amēngbiama chama ntsetatšēmbcá, y chē bacna soyēnga jamama ingñēnēnga imomnēnga, mo otšenēngcá imomnēngbiama, er cachánaca inye ora ndoñe yapa obenana ntsebmomana, chē bacna soyēnga jamama juabnēngama jtocochbuáchama. ³ Y chíyeca cha jtsemnana bayēnga jobáyama Bēngbe Bētsá juatšēmbonama, ndoñe nye entšangbioye bacna soyēngama cháuperdonama, ndayá chábioye chaboperdonámnaca. ⁴ Ndocná quenátobena cachá quem uámana trabajo jentšetayana, bachnangbe

más uámana amēndayá jtsemnana; cha jtsemnana, Bēngbe Bētsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. ⁵ Cachcá, Cristo ndoñe cachá tonjanenábuayana jtsemnana chē Bēngbe Bētsabe delante sempre bēngbiama impadaná, mo bachnangbe canye más uámana amēndayacá, ndayá Bēngbe Bētsá tbojanábuayana chē uámana trabajo jtsebmomana. Cha endmēna nda Jesúsbioye mēntšá tbojaniyana:

Aca atšbe Uaquiñá condmēna.

Mēnté entšanga sēnjinyanyé aca atšbe Uaquiñá comnana ca.

⁶ Y ínycocnaca, Bēngbe Bētsabe uabemana palabrenguine mēntšá tbojaniyana:

Aca nyetsca tescama canye bachna condmēna, canye bēts bachna ntšamo Melquisedec yojamncá ca.

⁷ Jesús quem luarentše yojeftsiyenēntscuana, cha juayebuáchēse y shēchbuíyeca Bēngbe Bētsáftaca ibnéncuentaye y ibnaimpadana, cha chē jobanámentšana jatsbocama yojanobená; y Jesús ntšamo Bēngbe Bētsá yojanbošcá tojánmayeca y tša respeto chabiamama bómnyeyeca, chábioye tbojanoyeuná. ⁸ Chca, Cristo masque Bēngbe Bētsabe Uaquiñá inamna, jasúfriase tojanábouinye ntšamo jamana ndayá Bēngbe Bētsá tojtsebošcá. ⁹ Chca, Bēngbe Bētsá chábioye tbojánbema lempe ntšamo entšanga tmojtsajabotcá, nda chēngbe bacna soyēngama cháuatsebacama; chentšana cha, Cristo, tojanma lempe ntšamo yojaniytcá, nyetscanga chē entšanga chábioye imojánēyeanēnga chamotsobenama nyetsca tescama

atsebácanënga jtsemnma; ¹⁰ y Bëngbe Bëtsá tbojanábuayana, chë chabe delante sempre bëngbiama impadaná, mo bachnangbe canÿe más uámána amëndayacá chaotsemnma, canÿe bëts bachna ntšamo Melquisedec yojamncá.

**Resjo endmëna, ošbuáchiyana
jtsajbanana**

¹¹ Bëtská entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nÿa uenana Bëngbe Bëtsabe soyëngama jósertana. ¹² Tšëngaftanga ya bayté Jesucristbe soyëngama šmotátšëmboyeca, tšëngaftanga cmontsamna ya jtsobenana ínÿengbioye chë soyënga jtsabuátambayana; pero tšëngaftanga cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontšë ora natsana jshauatsjínÿana soyëngama. Y chca, tšëngaftanga šmojobiama mo šësonatemëngcá, jtsëjabótana létšiyee jofšiyana y ndoñe jobenayana jasana chë jabmuánama ndoñe paselo tontsemna soyënga. ¹³ Chë nÿetsca soyënguinië ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canÿe šësonatemcá, nda vida jtsebonnana nÿe létšiyee jtseftmanëse. ¹⁴ Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoymenma, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

6 ¹ Chcasna, bënga šontsamna jtsajbanana nÿe jésebošana

jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontšë ora tmojanatsjinÿe soyënga, y šontsamna jtsatsjëndayana chabiama nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nÿe chë natsana buatëmbana soyëngama mattsatsjëndaye, mo chë ndayá yomna bacna soyënga jtsamana y chë bënga ndoñe vida ntsebonnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; ² chë juabáyana ndayá yomna; chë ínÿabe bestšašiñe cucuatšënga jacjayana Bëngbe Bëtsábioye chabiama jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebonnana o nÿetsca tescama castigánënga chamotsemnma. ³ Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

⁴ Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábënga bëtsemnma, y chë Uámána Espíritu chëngbe ainaniñe chaotsemándama imobomna, ⁵ y chë Bëngbe Bëtsá ntšamo tojašëbuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora, ⁶ chënga Jesucristbeñe ošbuáchiyana

lempe tmojtšajbanase, tondaye quenátsmēna ndayá jamama cachiñe Bēngbe Bētsábioye jtobéconama; er Bēngbe Bētsabe Uaquiñá chca stētšoye jaquédana, y jtsemnana mo Bēngbe Bētsabe Uaquiñábioye cachiñe chēnga tmojtsecrucificacá, y entšanga cachiñe cha chamotsáboyejuanama chēnga cuafjamcá. ⁷Šmochjinýe: fshantse jamana chē ba uaftēnēnga chiñe chaómashēnguama, y chē chiñe trabájayēngbiama bētscá jaja sananga tojóbcnēse, Bēngbe Bētsá jamana, chē fshantsentšana bētscá tšabe soyēnga entšangbiama chaotsebínýama.

⁸Pero nýe uchmašēshangá y matēnga uchmēfjangaca chiñe tojuábocnēse, chē fshantse tondaye ntsámanana; y nderado Bēngbe Bētsá nanjama chiñe ndocna tšabe mata chaonduábocnama, y cabana, entšanga chiñe mochantsashaniñá. Cachcá, chē ošbuáchiyana tmojtšajbananga castigánēnga mochántsemna.

**Bēngbe Bētsábeñe sempre
chamotsóbátmanama y ainaniñe
bētscá añemo chamotsebomnama**

⁹Pero masque chca montsoyebuambná, atšbe bonshánēnga, bēnga tšabá fséndétatšēmo tšēngaftangbeñe chē más tšabe soyēnga echántsemna, chē atsbočaná jtsemnana tojtšá cha yobomna soyēnga. ¹⁰Er Bēngbe Bētsá sempre ntšamo tšabá yomncá nýetsca soyēnguiñe jtsamana, cha ndegombre echántsejuabnaye ndayá tšēngaftanga šmojamama, y chē chabiama šmojinýinýe bonshánama, chabe entšángbioye jtsējabuáchanēse, ntšamo mórnaca šmojtšama. ¹¹Pero bēnga fséntseboše, cada ona tšēngaftanguentsá, nýets tempo y Jesús chaojésabēntscuana chaotsinýanýná

corente yoboše chca jtsamama, Bēngbe Bētsábeñe chca jtsošbuáchiyēse, chábeñe sempre chašmotsóbátmanama, tšēngaftangbe tšabiama cha chaomama.

¹²Ndoñe queftsátsboše tšēngaftanga oyēnjayēnga chašmotsobiama chē Bēngbe Bētsá tcmojabanýe trabajo jtsamama, ndayá Jesucristbeñe ošbuáchiyana bomnēngcá y padecena soyēnguiñe uantado mēnēngcá šmochtsama. Chca, chēnga mochanjóyēngacñe ndayá Bēngbe Bētsá jatšatayama tojašebuachenacá, chabe entšanga bétsemnama.

¹³Bēngbe Bētsá Abrahámbioye tbojanšbuachená ora, chca tbojanianyana cachabe uabaina jayanēse, er inýa chabiama más uamaná ndoñe yontsemna ndabiama jajúrama, ntšamo tbojanšbuachenacá ndegombre chaotsemnama; ¹⁴cha mēntšá tbojanšbuachená: “Añe, atše chanjama aca bētscá tšabe bendicionēnga chacotsebomnama, y chanjama acbentša pamillēntšana mallajta entšanga chamotsemnama ca.” ¹⁵Y chca, Abraham Bēngbe Bētsábeñe jtsošbuáchiyēse, puerte uantadiñe yojanobátmana ntšamo tbojanšbuachenacá Bēngbe Bētsá yochjanmama, y pronto chca tojanóyēngacñe.

¹⁶Entšanga tmojajurá ora, chca jamana chēngbiama canýe puerte más uámanabe uabaina jayanēse, y chca chēngbiama más uamanabiama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsētsnayana. ¹⁷Y chca, Bēngbe Bētsá tojánbošena botamana jinýanýiyana, ntšamo cha tojanašebuachenacá mochjanoyēngacñēngbioye, ntšamo tojanašebuachenacá cha ndegombre

yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninÿanyé cha chca yochjanmana, cachabiamama jajúrase, chë ntšamo tojanašebuachenacá yochjanmama ndegombre bétsemnama. ¹⁸ Bëngbe Bëtsabe šbuachenana soye y chama jinÿanyiyama ntšamo tojanayancá, ntšamo tojanašebuachenacá ndegombre yochjanmama, chë uta soye ndocná ntsoberenana jatrócama; y chca tojayana ora, ndoñe ntspodénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chášuatsebacama y chašotsanÿenama, mo canÿe bëts resjuentsana tmojtsachetëngcá, ntšamo chentšana atsebácanënga jtsemnama cuafstenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëts añémoca chábeñe jtsošbuáchiyëse, cha yejuana šochtsanÿenama mondobátmana. ¹⁹ Mo ntšamo chë bëjaye asentoca cuedádoca tcojajajo anclama, chë barcuñe enjaquenënga tšabá jtsetatšëmbuana chë barco ndoñe yochántssashatiyiyama, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucrístbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina luaroye, entšëjua ujonÿana stëtsoica, Bëngbe Bëtsabe delante jtsemnama, ²⁰ ndayentše Jesús celoca,

Bëngbe Bëtsabe delante tojámashëngo bëngbe tšabiamama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nÿetsca tescama, canÿe bëts bachna ntšamo Melquisedec yojamncá.

**Jesús, canÿe bëts bachna ntšamo
Melquisedec yojamncá**

7 ¹ Quem Melquisedec yojamna Salem puebloca rey y bachna chë celoca Bëngbe Bëtsabiamama; Bëngbe Bëtsá, chë nÿetscangbiamama más uamaná. Abraham chë reyënga y chëngbe soldadëngaftaca imojentsjaná y tojanayëñjaná chentšana yojtsatabó ora, Melquisedec tojánbocna cha jajébenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. ² Chora Abraham chábioye tbojanatšetà, chë reyëngaftaca imojentsjaná ora, lempe tojanosháchiñentšana, bnëtsanentšana canÿe soye. Chë palabra Melquisedec endayana “nÿetsca soyënguiñe tšabá ama rey ca”; y chánaca yojamna Salem puebloca rey, y chca endayana “nÿetscanga natjëmbana chamotsiyenama ama rey ca”. ³ Chabe pamíllangbiamama tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatšëmbo ntseco tojanonÿinama, ni ntseco tojanóbanama; chca, inÿe soyënguiñe cha yojamna mo Bëngbe Bëtsabe Uaquinacá, y endmëna mo nÿetsca tescama bachna cuafstsemncá. ⁴ Y mora, šmochjajúaboyme tša uamaná Melquisedec inamnama, er bëngbe tempsca uámana bëts taitá Abraham chábioye tbojanatšetà, chë

reyéngaftaca imojentsjaná ora lempe tojanosháchiñentšana bnétsanentšana canýe soye. ⁵Ntšamo Moisesbe leyíñe endémandacá, chë bachnangbe más uámana amëndayá Leví, Aarónënaca ca uabainabe pamillentsana tmomna bachnanga, jtsamnana chë Israeloca entsángbioye nyetsca chë tmobomna soyénguentšana bnétsanentšana canýe soye jtsayéngacayana; y chca jtsamnana masque chë entsanga cachéngbe pamillentsénga tmomna y Abrahámbentsšana pamillentséngnaca. ⁶Pero Melquisedec, masque Aaronbe pamillentsá ndoñe yonjamna, Abraham, chë ntšamo Bèngbe Bètsá tbojanšbuachenacá tojanóyèngacñabentsšana, cha tojanóyèngacñe nyetsca soyénguentšana bnétsanentšana canýe soye, y Bèngbe Bètsábioye tbojanimpadá, Abraham bètsca tšabe bendicionénga chaotsebomnama chaomama. ⁷Y ndocná quenátobena jayanama ndoñe ndegombre yondmëna ca, chë Bèngbe Bètsábioye impadaná ínÿabiana tšabe soyénga chaomama, más uamaná inétsemna chë chca tojóyèngacñabiamana, inÿa chabiamana Bèngbe Bètsábioye tbojaimpadá ora. ⁸Quem tempo, bachnanga mochióbanénga, entsángbioye jtsayéngacayana nyetsca chë tmobomna soyénguentšana bnétsanentšana canýe soye, pero chë Bèngbe Bètsabe uabemana palabra, Melquisedecbiama endoyebuambná cha mo canÿa cabá ainá totsomñcá. ⁹Y bënga montsobena jayanama, Abraham Melquisedécbioye chë nyetsca soyénguentšana bnétsanentšana canýe soye tbojanoyé ora, yojamna mo Leví, chë nyetscángbioye nyetsca soyénguentšana bnétsanentšana canýe soye ayéngacayá, Melquisedécbioye

chca cuaftopagacá; ¹⁰er cha Abrahambe pamillentsá inamna. Melquisedec vojtsabó ora y chábioye chë lempe tojanosháchiñentšana bnétsanentšana canýe soye Abraham tbojanatsetá ora, yojamna mo nyetscanga, chë Abrahámbentsšana entsanga más chcoye mochtsaniyenénga, chéngnaca chë bnétsanentšana canýe soye cuafjajajocá, masque Abraham chca tojanma ora, Leví y chë Abrahámbentsšana inÿe entsanga cabá ndoñe tmonjanonÿná.

¹¹Israeloca entsanga Moisesbe ley tmojanáyéngaca, chë bèts taitá Levibe pamillentsénga bachnanga imojamnénga Bèngbe Bètsá imojtseservena ora, y chénga monjamna Aarónbentsšana entsanga. Ntšamo chë leyíñe yomandancá imojánaménga perdonánénga jtsemnama y Bèngbe Bètsabe bominÿiñe tšábenga jtsemnama quem bachnanga jamama matmënjanobenase, ndoñe manjanéyta Bèngbe Bètsá inÿe bachna chabuatschembuama, nda ndoñe yonjamna mo chë bèts bachna Aaroncá, ndayá ntšamo chë bèts bachna Melquisedec yojamncá. ¹²Er, canýe bachnanga Bèngbe Bètsábioye jtsseservénama tmojajbaná y inÿe bachnanga chábioye jaserviama tmojatontsé ora, jtseytana chë natsana bachnanga imojanoservena ora mándaye leyéngnaca jtsetrócama. ¹³Bèngbe Utabná, ndabiamana quem soyénga jtsóyebuambnayana, ndoñe Aaronbe pamillentsá quenjatsmëna, ndayá inÿe pamillentsá, y quem pamillentsá entsanga ndocna te bachnangcá Bèngbe Bètsá tmonjanservé, chë altar ndirichiñe Bèngbe Bètsabe bèts yebnoca. ¹⁴Er nyetscanga mondétatšëmbo Bèngbe Utabná Judabe pamillentsana

bétsemnama, y chë pamíllama Moisés ndocá tonjánayana, Bëngbe Bëtsá mo bachnangcá chënga jtseservénama.

¹⁵ Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá. ¹⁶ Cha bachna yojamna, ndoñe chë bachnanga chabe pamillentsana jabocanama yojánamnama canye ley tojánayanayeca, ndayá nyetsca tescama jëftsiyenama cha inobénayeca. ¹⁷ Er mëntšá endmëna, ndayá Bëngbe Bëtsá chabiamama tojánayana:

Aca bachna nyetsca tescama
condmëna,
canye bëts bachna ntšamo
Melquisedec yojamncá ca.

¹⁸ Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entšanga jubabuáchama atsebácanënga jtsemnama, y chca, chëngbiamama ndoñe bëtscá yonjanoservena. ¹⁹ Er Moisesbe léyeca, entšanga ndoñe tmonjanobená Bëngbe Bëtsabe bominýiñe tšábenga jtsemnama, pero mora chama canye corente más uámana soye montsebozna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chášubiamama, y chca, Bëngbe Bëtsábioye bënga jtobéconama.

²⁰ Y Bëngbe Bëtsá lempe chca tojanma, cachabiamama jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentsëngbioye tmojanëbuáyana ora, Bëngbe Bëtsá ndoñe chca tonjánayana, ²¹ pero mo bachnëcá chaoservema Bëngbe Utabnábioye tbojanábuayana ora aña; cach Bëngbe Bëtsabiamama

jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrënguiñe endayancá:

Bëngbe Utabná Bëngbe Bëtsá,
Jesucristbioye tbojanayana,
cachabiamama jajúrase, ntšamo
tojanayancá ndegombre
chaotsemnama,
y juabna ndoñe ntjatrócama:
“Aca bachna nyetsca tescama
condmëna ca.”

²² Bëngbe Bëtsá chca tojánayanama, Jesúsbeñeca bënga corente mondétatšëmbo, ndayá Bëngbe Bëtsá bëngbiamama jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entšangbiamama tojanašebuachená soyama. ²³ Chë inye bachnanga banga imojamna, er ndocná yonjanobena Bëngbe Bëtsábioye nyetsca tescama chca jtseservénana; cada ona básefta uatëngama tojëftsanoservé, tojanóbana y inyábioye chë trabajo jatontšabuáchana. ²⁴ Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjéftseservena, y ndocna te chabe trabajo inyábioye bochanjëftsinýinýiye, chë inya cachcá jtsamama chauatontšëma. ²⁵ Chíyeca, cha yobena nyetsca tescama játsebacana ndëmuanýënga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiamama jtseimpadánama.

²⁶ Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiamama chabotseimpadánama, mo chë bëngbe bachnangbe más uámana amëndayacá.

Cha sempre uamaná endmëna, ndocna te ni mo canÿe juabna ñnyabe contra yonjábomna, ainaniñe ndocna bacna juabna yonjábomna, chë bacna soyënga amënguentsana luaroca mëná, y Bëngbe Bëtsá tojanma celoca más bëtsá y obená nyetscangbiama cha chaotsemnama.

²⁷Cha ndoñe bonjanájaboto canÿe te y inÿe te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entsanga tmojanmámna, mo chë inÿe bachnangbe más uamana amëndayënga mondbetsamcá, cachëngbiama y chë judiëngbiámna. Cha tojanma lempe ntšamo yojaniytcá canÿe soye y nyetsca tescama, entsanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsoptomñama cachcá tojanonÿná ora; y tojanóbana entsanga chamotsobenama perdonánënga jtsemnama. ²⁸Ntšamo Moisesbe leyinë yojanmandacá, chëngbiama mo chë bachnangbe más uamana amëndayëngcá tmojanëbuáyana entsanga inÿe ora bacna soye amënga; pero Bëngbe Bëtsá cabá chë ley entsangbe cucuatšinë tojanáboshjonentsana baytese, cha chabe Uaquiñábioye chë bachnangbe más uamana amëndayacá tbojanábuayana, cachabiama jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entsanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

Cristo, nda jóbanëse tojanma entsanga Bëngbe Bëtsáftaca mo canÿacá chamotsemnama

8

¹Chë más uamana soye ndayama bënga montsichamo,

chë Cristo mo bachnëcá yomnama montsoyebuambná ora, entsemna: Bënga chábeñe imojtsebomna canÿa nyetsca tescama Bëngbe Bëtsabe delante bëngbiama impadaná, mo chë bëngbe bachnangbe más uamana amëndayacá, Bëngbe Bëtsabe catsbioica yojtsetbemana jtsemándayama, y Bëngbe Bëtsá chë más uamana tbemanentše. ²Chë inÿe bachnanga Bëngbe Bëtsabe bëts yebnentše tmojánamashjna chë “más uamana ca” uabaina luaroye, Bëngbe Bëtsabe delante jtsemnama; pero chë luare celoca ndayentše nyets tempo Cristo mo chë bachnangbe más uamana amëndayacá yoservena, entsanga ndoñe chca tmonjanpormá, ndayá Bëngbe Bëtsá.

³Nyetscanga chë bachnangbe más uamana amëndayënga tmojanëbuáyana, entsangbiama soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama.

⁴Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyinë yomandancá. Y chca, ndoñe nantseyta cha chca chauatoservënama. ⁵Chë inÿe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë ndayentše Jesucristo celoca yoservena luarcá, ni ntšamo cha yoservencá; nÿe batšatema bëngbioye šuinÿanÿná ntšamo chë celoca luare yomnama, ndayentše Cristo

mo bachnecá yoserverna. Y bēnga mondétatšēmbo quem luarentše chē soyēnga chca yomnama, er chē Bēngbe Bētsábioye jadórama yebna, chē jatsjacama opodena yebna Moisés japórmama ora, Bēngbe Bētsá mēntšá tbojaniana: “Cuedado cochtsebomna chē atšbiana yebniñe nyetsca soyēnga jamama, ntšamo tbonjaninýinýecá chacomama, chē tjoca bonjamna ora ca.” ⁶ Pero bēngbe bachnangbe más uámana amēndayá Cristo, tojashjache canye más bēts trabajo jtsebomnama, ntšamo chē inye bachnanga imobomna trabajuama; cachcá, ndayá Bēngbe Bētsá tojayancá Crístoftaca bēngbiana jamama, bēnga tempcá tšabá Bēngbe Bētsáftaca jtsemnama jtsamēse, puerte más tšabá endmēna, chē ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyēnga bēngbiana jamama.

⁷ Chē Bēngbe Bētsá natsana tojanašebuachená soyēngaca matēnjanopodé entšanga chamotsamama ntšamo yojanamncá, ntšamo tojanašebuachenacá jóyēngacñama, as ndoñe manjanēyta Bēngbe Bētsá cachiñe canye trato chauátsbemama entšangbiana.

⁸ Pero Bēngbe Bētsá tojáninýe ntšamo yojanamncá entšanga ndoñe tmonjanmama, ntšamo cha tojanašebuachenacá jóyēngacñama, y Bēngbe Utabná Bēngbe Bētsá chēngbiana mēntšá tojánayana:

Canye tempo echanjóshjango, y chora Israel y Judabe pamillentsá entšangbiana básefta soyēnga jamama chanjašebuachená, chēnga átseftaca tempcá tšabá jtsemnama chamotsobenama.

⁹ Chē chanjašebuachená soye ndoñe queochátsmēna cachcá ntšamo chē chēngbe bēts taitanga sēnjanašebuachená soye enjamncá, atše chēnga sēnjanēnatse ora, Egiptó luarocana sēnjésanēbuacna ora; pero chēngna, ntšamo jamama enjanamncá, chē sēnjanašebuachená soye jóyēngacñama ndoñe chemátanma causa, atše cachcá chēnga sēnjesanēnyaya ca, Bēngbe Utabná tojánayana.

¹⁰ Chē Israeloca entšangbiana ndayá jamama canye tempo chentšana chanjašebuachená soye, mēntšá entsemna ca, Bēngbe Utabná tojánayana: Atše chanjama chē chēngbe juabniñe chaitsemánda soyama chēnga chamotsejuabnama, y chamotseboše jtsamana ndayá chēngbe ainaniñe chaitsemánda soye.

Atše chēngbe Bētsá chántsemna, y chēnga atšbe entšanga.

¹¹ Chē tempo ndoñe queochátsiya cánýenga ínýenga chamotsabuátambama, cachabe luariñe oyanábioye o cachabe pamillentsá entšábioye, atše chē chēngbe Utabná chašmotsábuatmama. Ndoñe queochátsēyta, er nyetscanga uámanēnga y nduámanēnga, corente tšabá atšbe šmochantsábuatma.

¹² Chēnga chanjálastemaye y chēngbe bacna soyēngama chanjáperdonaye, y ndocna te más chē bacna soyēnga chēnga tmojamama

quichátsjuabnaye ca —cha tojánayana.

¹³Bëngbe Bëtsá, chë entsangbiana mora jamama tojásebuachenama tojtsichamo ora, chca jtsemnana, er cha tojama chë tempo entsangbiana jamama tojanašebuachená soye, mora ya ndoñe chaondëtsosevénama; ndayá mo tanguá soycá tojtsemna y ya ndoñe tontsosevna, chë soyna nÿe batšatema más y ya jtsopochócana.

Bëngbe Bëtsá jadórama muentša luare y chë celoca luare

9 ¹Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiana pormana yebnentše quem luarentše. ²Chíyeca, Bëngbe Bëtsá tojanmandá chaotsemna canÿe jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiana yebnentše inauabaina “chë uámana luare ca”; chentše inamna chë canÿséfta quinÿenëfjuangá castellano candelerëšiñe, y canÿe mesésha ndayiñe yojacjana chë luarentše Bëngbe Bëtsá bétsemnana inÿinÿnaye tandëšënga.

³Inÿe ujonÿana entsëjua chentšana, inÿe luare inamna; inauabaina “chë más uámana luare ca”. ⁴Chentše inamna chë castellano altar, inciense jajuinÿiyama, y chë cajontema nÿetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inÿinÿnaye cajontema ca”; y chë tsoye quem soyënga inabomna:

canÿe castellano jarrëtema, maná ca uabaina tandëšëca, chë Bëngbe Bëtsá tojanma celocana chabe entsangbiana chaótsatsama saná; Aaronbe varëfja, chë tojanantšëfjonëfja; y chë ndëtšbé tablëbenga ndayiñe Bëngbe Bëtsá tojanábema chë bnëtsana uámana mandënga. ⁵Chë cajontema juatsboca inamna chë juatëngmiášha uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buashinÿinÿanana chéntšnaca bétsemnana. Chënga, chë juatëngmiášhangaca chë cajontëmentša nÿets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entsanga cháuaperdonama. Pero mora ndoñe quenátsiyta chë soyëngama lempe jatóyebuambnayama.

⁶Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. ⁷Pero nÿe chë bachnangbe más uámana amëndayá yojobena chë inÿe luaroye jamashënguana, y nÿe canÿe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëngnaca. ⁸Chca, chë Uámana Espiritu jamana bënga chašósertama, chë natsana luare cabá tojtsemnëntscuana y chë

bachnanga cabá chë soyënga chentşe tmojtsamëntscuana, nyetscanga cabá ndoñe tmonjanobená chë inye luaroye jamashnama, chë “más uámana luaroye”. ⁹Chë soyéngaca jtsopodénana béngbioye jinyanjyana, chë tempo, chë Bëngbe Bëtsábioye jadórana yebnentşe entsànga uta luare imojábomna ora, ndoñe yonjopodena Bëngbe Bëtsabe delante nyetscanga jatsmënana, mo chë bachnangbe más uámana amëndayacá. Y chë soyéngaca jtsayanana, chë Bëngbe Bëtsabiana uátšëmbona soyéngaca y bachnanga tmojanóba bayéngaca, ndoñe tonjanopodé jamana canya Bëngbe Bëtsábioye adorayá, Bëngbe Bëtsáftaca tempcá tsábá chaotsatsmënana y Bëngbe Bëtsá chabe bacna soyéngama tbojaperdonama ainaniñe corente chaotsetatšëmbuama. ¹⁰Chënga, chë uátšëmbona soyéngaca y tmojanóba bayéngaca tmojanma nye ntšamo Moisesbe leyine yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tsabe entsàngacá Bëngbe Bëtsabe delante jtsatsmënana; nyetsca mandënga nye cuerpama, pero ainanama tondaye ntjamana. Pero chë entsànga chca yojánamna jtsamana, nye Bëngbe Bëtsá inye soyënga, más tsabe soyënga jamama tojamandantscuana, chë tsëm trato tojábema ora.

¹¹Pero Cristo ya tojánabo, y cha yomna chë Bëngbe Bëtsabe delante béngbiana impadaná mo chë béngbe bachnangbe más uámana amëndayacá, chca, béngbiana chaotsemnama chë tsabe soyënga ntšamo mochjoyëngacñécá. Chë luare celoca ndayentşe cha Bëngbe Bëtsabe delante mo bachnécá yotrabája,

puerte tsabe luare yomna, y chentşe cha, ndoñe chë quem luarentşe bachnanga imomnëngcá, cha yobena jamana lempe ntšamo Bëngbe Bëtsá entsàngbiana jamama inajuabnycá. Chë luare ndoñe entsàngbe cucuátšëca yondëpormana, y chca jtsayanana, quem luarentša soye ndoñe yondmëna ca. ¹²Cha, canye y nyetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inye bachnanga imojuamancá; ndayá jóbanëse, chabe buiñe juabuáshañëse, cha tojanma entsànga atsebácanënga jtsëmnama chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tsabe vida jtsebomnama chamotsobenama.

¹³Ndëmuanjyënga ndayámncaca chë leyama tmojanoquedá mo chë Bëngbe Bëtsabe delante ndoñe tsábëngcá, chë bachnanga imojuamana chëngbioye toronga y chivëngbe buiñe jabuéscacjana, y chë altaroca tcojajuinjë ternerabe jatinjya chëngbioye jatbótotana, chca, chënga jábiamama Bëngbe Bëtsabe delante mo tsábëngcá. Chca tmojamentšana, chë bachnanga tmojánayana chënga imojtsobena chë inyëngaftaca jabama, Bëngbe Bëtsá jadórana, y cachiñe mo tsábëngcá Bëngbe Bëtsabe delante imojtsatsmëna ca. ¹⁴Ndayá bachnanga tmojanmcá yojánamana entsànga cachiñe mo tsábëngcá Bëngbe Bëtsabe delante imojtsatsmëna ca jayanama; y chca, chë inyëngaftaca Bëngbe Bëtsábioye jadórana tmojanobenase, intsachetšá más yojsámama Cristbe buiñe, ndëmuanjyëye tojanábuashana

bëngbiana cha tojanóbana ora! Chë nyets tempo vida bomná Espíritbe obenánaca, Cristo, chabe derecho vida jtsobomñama cachcá tojanonýa y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canýe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmo, bacna soyënga bënga tmojamama, chë ndoñe vida jtsebonnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservénëse.

¹⁵ Chíyeca, Cristo jóbanëse tojama entšanga Bëngbe Bëtsáftaca cánýiñe mo canýacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebonna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

¹⁶ Ntšamo canýe testamentiñe tojtsayancá chaopasamna, jtseytana chaotsótatšëmo chë chca jamama tojašbuachená cha tojóbanama.

¹⁷ Canýe testamento tondaye ntsámanana, chë chca jamama tojašbuachená cha cabá ainá

totsomñëntscuana; nýa cha tojóbanana orna aiñe. ¹⁸ Chíyeca chë Bëngbe Bëtsabe natsana trato, entšangbeñe tojanobojaťsé, chora tmojanóba bayëngbe buiñe jabuéšcýese. ¹⁹ Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshëca enajuabnëyiñe tojanfchecuacuá, y chora chë leyënga librëšañe tojanbuéscacja, y nyetsca entšangbeñnaca. ²⁰ Y mëntšá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnama, y tšëngaftangbiana puerte yochtsámanama ca.”

²¹ Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoserverna. ²² Er ntšamo leyiñe iuayancá, yojtsemna nýa mo nyetsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanësa, ndoñe ntsopodénana entšanga bacna soyëngama perdonánënga chamotsemnama.

**Cristo jasúfriase y jóbanëse,
tojanma entšanga bacna soyëngama
perdonánënga chamotsemnama**

²³ Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñëca. Chë soyënga batšatema jtsinýanýanayana ntšamo chë celoca luare yomnana

Bëngbe Bëtsabe delante, ndayentše Jesús yoserverna. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše inmëtsama soyëngama. ²⁴ Er Cristo ndoñe tonjánamashëngo canye luarentše Bëngbe Bëtsá jadórama nye entšangbe pormánentše, ndaye luare nye batšatema jtsinýanýnayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiama jtseimpadánama. ²⁵ Chë bachnangbe más uámana amëndayana chë “más uámana luaroye” jamashënguana canye cada uata, bayëngbe buñeca, ndoñe cachabe buñeca, chca, ndayánaca jamama entšanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentšana jtéseboncama, y chabe buñe juabuáshanëse cachiñe jatóbanama, y ba soye cachcá chauëtsemnana. ²⁶ Chca tojtsemnëse, Cristbiama manjanmëna jasúfriana y jóbana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonýinyë quem luarentša entšanga bacna soyënga jabuajuánama, chëngbiama jóbana, mo entšangbe chca soyëngama canye tmojóba bayá, Bëngbe Bëtsábioye uatšëmbonacá. ²⁷ Cachcá, ntšamo nyetsca entšanga jtsamnana nye canye jóbana, y chentšana Bëngbe Bëtsá chëngbiama

layanana chë imojëtsiyenëntscuana ntšamo tmojanmcá tšabá o ndoñe tšabá bëtsemnana, y chëngaftaca jamana ntšamo chora tojajuabocá, ²⁸ cachcá, Crístnaca, nye canye chabe derecho vida jtsobomñama cachcá tojanonýá, chabe buñe juabuáshanëse jóbana, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

10 ¹ Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inye soyëngaca, ndoñe ntsinýanýnayana lempe chë Bëngbe Bëtsá chabe entšanga jatsatayana puerte tšabe soyënga, pero añe batšatema jtsinýanýnayana ntšamo chë soyënga yochtsemnana. Chíyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnana. ² Er ndayá tcojtsamama Bëngbe Bëtsabiama uatšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtsemnana matmëñanobenase, chënga chë bacna soyënga tmojanmama ainaniñe ngmënaca y ndoñe mamëñjëtsemna, y matmëñsanajbaná soyënga amana chë tmojóba bayëngaca. ³ Pero juatšëmbonama entšanga bayënga tmojóba ora, josérviana

entšanga bacna soyënga tmojamama cada uata chamuatenójuaboma; ⁴er chë toronga y chivënga tmojóbanëngbe buñëca ndoñe ntsopodénana entšángbioye bacna soyënga jabuajuánama.

⁵Chíyeca, Cristo quem luaroye tojánabo ora, Bëngbe Bëtsábioye mëntšá tbojanianyana:

Ndoñe tconjábošena entšanga chacmátšëmbona soyënga, ni tmojobaye bayënga, pero aiñe tcojama atše canye entšacá chaitsemnama.

⁶Ndoñe tšabá quecmátinýana chë tmojóba y tmojajuinýé bayënga, entšanga bacna soyëngama chacotsaperdonama.

⁷As atše Bëngbe Bëtsá sënjanianyana: “Bëngbe Bëtsá, muentšë séntsemna, ntšamo aca icobošcá atše chaimama, ntšamo acbe uabemana palabrenguiñe atšbiamá endayancá, chë ndayá atše chjanmama ca.”

⁸Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjaninýnana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýé bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyíñe uiayancá ndayá chënga jamama yojtsamna. ⁹Y chentšana, Cristo Bëngbe Bëtsábioye tbojátaniyana: “Muentšë sënjabo, chë ntšamo aca icobošcá atše chaimama ca.” Chca, Cristo tojinýanyé chë jtsamana soyënga tmojóba bayëngaca, tondaye yonduámama entšanga bacna soyënga

jabuajuánama, y entšangbe bacna soyëngama jóbanëse tojaninýanyé chë ntšamo Bëngbe Bëtsá yobošcá jtsamana, más iuámama chë inye soyënga játamama. ¹⁰Bëngbe Bëtsá tojama, bënga chabe entšanga y chabe delante tšábenga chamotsemnama, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entšangbe bacna soyëngama jóbanëse, canye y nyetsca tescama.

¹¹Judiëngbe nyetsca bachnanga nyets tempo ba soye altarentšë natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama.

¹²Pero Jesucristo entšangbe bacna soyëngama tojanóbana ora, yojamna mo canye tmojóba bayacá, Bëngbe Bëtsá entšanga bacna soyëngama cháuaperdonama; nye canye y nyetsca tescama chca tojanma, y chentšana Bëngbe Bëtsabe catšbioica tojtantóbema, canye uámama puentestšë, jtsemándayama. ¹³Chentšë cha yobátmana, Bëngbe Bëtsá chabe obenánaca Cristbe uayayënga chabe cucuatšíñe chamoquedama yochjamëntscuana. ¹⁴Er nye canye, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábënga jtsemnama chëmbonënga, chabe delante nyetsca tescama tšabengcá chamotsemnama. ¹⁵Y Uámama Espíritnaca, Bëngbe Bëtsabe uabenana palabrenguiñe šontsinýanyé chca ndegombre bëtsemnama, mëntšá tojánayana ora:

¹⁶Ndayá entšangbiamá chjama, canye tempo chentšana chanjašëbuachená soye mëntšá

entsemna ca, Bëngbe Utabná
tojánayana:

Atše chanjana chënga
chamotseboše jtsamana ndayá
chëngbe ainaniñe chaitsemánda
soye,
y chamotsejuabnama chë chëngbe
juabniñe chaitsemánda soyama
ca.

¹⁷Y chentšana mëntšá tojánayana:
Ndocna te más quichátsjuabnaye
chënga bacna soyënga
tmojamama,
y ntšamo atše tsebošcá contra
soyënga chënga tmojamama ca.

¹⁸Chcasna, Bëngbe Bëtsá nyetsca
tescama entšanga bacna soyëngama
tojaperdoná ora, ya ndoñe ntjásiytana
inÿe soyënga más játamama, mo
bayënga cuafjobaycá, entšanga
bacna soyëngama perdonánënga
chamotsemnama.

Šontsamna Bëngbe Bëtsábioye jtobéconana

¹⁹Y chca, Jesucrístbeyeca catšátanga,
Jesusbe buiñe tojanábuashanama y
bëngbiana tojanóbanama, chábeñe
jtsošbuáchiyëse, bënga montsobena,
tondayama ntjatauatjácá Bëngbe
Bëtsabe delante jamashënguama.

²⁰Bënga montsobena jamashënguama
chë tsëm benachëjana, Cristo
bëngbiana tojamëjana; cha nda
inétsama chë nyetsca tescama yomna
tšabe vida chamotsebomnama. Mo chë
quem luarentše chë bachnangbe más
uámama amëndayacá, chë ujonÿana
entšëjuajana jamashënguana chë “más
uámama ca” uabaina luaroye, Bëngbe
Bëtsabe delante jtsemnama, cachcá,
Cristo bëngbe bacna soyëngama mo
entšacá tojanóbanayeca, bëngnaca
montsobena Bëngbe Bëtsabe delante
luaroye jamashënguama. ²¹Bënga

mondombna canÿe bëts bachnangbe
más uámama amëndayá, Bëngbe
Bëtsabe entšángbeñe jtsamándayama,
y cha endmëna Jesús. ²²Chíyeca,
Bëngbe Bëtsá jaserviama ndegombre
ainaniñe corente jtsebošëse, y chábeñe
puerte jtsošbuáchiyëse, šontsamna
Bëngbe Bëtsábioye jobéconana.
Ntšamo chë bachnángbioye buñëca
tmojanabuešcaccjá, Bëngbe Bëtsabe
delante tšabengcá chamotsemnama
cha jaserviama, cachcá, Cristbe
buiñe juabuáshanëse y bëngbiana
jóbanëse, bënga ainaniñe corente
montsetátšëmbo Bëngbe Bëtsá nyetsca
tescama bëngbe bacna soyëngama
šojtsaperdonama. Y bënga béjayeca
uabainéngnaca mondmëna; chíyeca
bënga jtsobenana Bëngbe Bëtsábioye
chca jobéconana.

²³Bënga šontsamna nyets
tempo Bëngbe Bëtsábeñe puerte
jtsošbuáchiyana, y ndocna te nÿe
ndayámnaca játajbanana entšángbeñe
ichámuana, chë Bëngbe Bëtsábeñe
jtsošbuáchiyëse bënga imobatmana
soyënga cha yochjamama, er chë
soyënga šojašëbuachená cha, sempre
jamana ntšamo tojayancá. ²⁴Bënga
šontsamna janguanguana ntšamo
muatjobenaye añemo jenatšëtayana,
nyetscanga jtsenbobonshánana, y
ntšamo tšabá yomncá jtsamana;
²⁵pero ndoñe quešnátamna
jătăjbanana, Bëngbe Bëtsábioye
jadórama enefjuanana mo Cristbeñe
ošbuáchiyënga quetsomñëcá, ntšamo
báseftanga imojtsamcá. Chamna,
nyetscanga añemo mochtsenatšëtnaye
Cristo nyets tempo jtseservénama, y
más mora, chë ndayá imojtsonÿama,
Bëngbe Utabná yochjésabama ya
yojtsobecuama montsetátšëmbo ora.

²⁶Er chë ndegombre soyëngama
tšabá tmojátatšëmonentšana y chë

soyënga tmojoyeuná chentsana, bacna soyënga jtsamëse tmojtsiyena, nÿe chca jamama tmojtseboše causa, muattsaboté ndayá Cristo bëngbiama tojanmcá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama. ²⁷Y chca, ndayá bënga muattsobena jobátmana soye nántsemna nÿe chë Bëngbe Bëtsábiocana castigo, chë ndayama šojtsamna uatjana jtsebomnana; y nÿe jobátmana chë tempo, ndaye ora Bëngbe Bëtsá puerte etonaná chabe uayayënga bëtsá íñesheca yochtsapochóca. ²⁸Ndánaca chë Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chënga tmojayanëse, jtsemnana chë entšábioye jtsóbana, tondaye ntjalastemacá. ²⁹Canÿa, nÿets ainánaca Bëngbe Bëtsabe Uaquiñábioye tbojtsaboté; y tojayana Cristbe buiñe, chë ndémuanÿeye tojanábuashana bëngbiama tojanóbana ora, tondaye yonduámana ca, ndayá nÿe ndaye entšabe buiñá ca, chë buiñe chë ndémuanÿeye šojtsinÿanÿná ndayá Bëngbe Bëtsá tbojašebuachenacá bëngbiama jamama, y ndáyeca Bëngbe Bëtsá chabe entšanga šojábíama, cha jaserviama; chë entšá Uámana Espíritbioye tbojóyenguango, nda inétsama bënga tšabe soyënga chamotsebomnama; y canÿa chca amá, ítšëngaftanga ndoñe šmontsejuabná cha ibojtsomerecena Bëngbe Bëtsábiocana canÿe puerte más uabouana castigo, chë Moisesbe leyama tondaye yondovalena ca tojayanabíama? ³⁰Bënga nÿetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínÿenga chamosufrima

tmojama causa; y chënga chanjácastigaye, ínÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbiama echanjayana ntšamo tmojëftsemcá tšabá o ndoñe tšabá bëtsemnana, y chëngaftaca echanjama ntšamo chora chaojajuabocá ca.” ³¹Ítša uabouana, Bëngbe Bëtsá chë nÿets tempo ainabe cucuatšíñe joquédana, castiganá jtsemnana!

³²Pero ntšamo tempo yojamnama šmochtsenójuabnaye, chë ndegombre soyënga Jesucristbíama cabá chora šmonjanábuatmana ora, y chora tša jenojuérzana cmonjanotocá padecena soyënguiñe, y chë causa tša šmojansufrí. ³³Báseftanga tšëngaftanguentšëngbioye entšangbe delante tcmojanoyánguango, y ínÿenga tmojanma puerte chašmotsesufrínama; y ínÿenga tšëngaftanguentšënga chca imojansufrinëngaftaca šmojanama, chënga jujabuáchama. ³⁴Tšëngaftanga šmojánalastemana chë chënguentšënga cárceloye imojanëtámenënga; y oyejuayënga šmojanlesenciá ntšamo šmojanbomncá ínÿenga chacmotsabacama, er tšëngaftanga šmojátatšëmbona Bëngbe Bëtsábiocana más tšabe soyënga šmojtsebomnama, chë nÿetsca tescama šmochtsebomna soyënga. ³⁵Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobatmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnama. ³⁶Tšëngaftanga cmontsamna corente uantadënga jtsemnana, padecéniñe chašmojtsachñëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá

Bèngbe Bètsá tojanašebuachenacá chašmóyèngacñiama. ³⁷Er Bèngbe Bètsabe uabemana palabrenguine cha mèntśá tojánayana:

Betsco, ndoñe bèn, y chë jabama ibomná echanjabo.

Ndoñe bèn quebochatóbema.

³⁸Nye chë ndabiama atše chajjama atšbe bominýiñe tšabia

chaotsemnama,

átšbeñe cha betsošbuáchema,

cha ndegombre chë nyetsca

tescama yomna tšabe vida

echántsebomna;

pero uatjana causa, átšbeñe

ošbuáchiyana tojtsajbanase, atše

cháftaca ndoñe quichátoyeuaye

ca —cha tojánayana.

³⁹Pero bènga ndoñe quemátmèna chë uatjana causa Bèngbe Bètsabeñe ošbuáchiyana tmojtsajbananga, y chca, nyetsca tescama pochocánènga jtsemnama imojtsajnènga; pero aíñe mondmèna chë Bèngbe Bètsabeñe ndegombre ošbuáchiyènga, y chca, chë atsebácanènga jtsemnama mochjashjáchènga.

Bèngbe Bètsabeñe

ošbuáchiyana jtsebomnana

11 ¹Ošbuáchiyana jtsebomnana endmèna corente jtsetatšèmbuana, ndayá tmojtsobatomancá ndegombre chca yochjopásama; endmèna ainaniñe corente jtsetatšèmbuana, ndayá bènga mora ndoñe tmontsonýacá ndegombre chca yomnama. ²Bèngbe Bètsá tojánayana bèngbe bèts taitanga tšabá imojánama ca, chènga chábeñe imojtsošbuachéyeca.

³Bènga, Bèngbe Bètsabeñe mondošbuachéyeca, mondétatšèmbo cha quem luare y nyetsca luarènga tojanmama, chca chaotsemnama cha

tojanmandá ora; chcasna, chë ndayá mora bènga jinýama imobencá, cha tojanma bènga ndoñe mondobena jinýama soyènguentśana.

⁴Abel Bèngbe Bètsabeñe vojanošbuachéyeca, oveshatémènga chábioye tbojanátšèmbona, y chë soye Bèngbe Bètsabiama más tšabá yojtsemna, chë ndayá Caín, chabe catsata, Bèngbe Bètsá jètschuayama tbojanátšèmbonama. Chíyeca, Bèngbe Bètsá tojánayana Abel chabe bominýiñe tšabia yojtsemna ca, ndayá Abel chábioye jètschuayama tojanmcá oyejuayá tojanóyèngacñeyeca. Ntšamo Abel Bèngbe Bètsabeñe vojanošbuachecá, masque cha ya obaná yojtsemna, chë soye cabá bènga šontsabuatambá.

⁵Enoc Bèngbe Bètsabeñe puerte vojanošbuachéyeca, Bèngbe Bètsá celoye tbojesanbètšèñe, ntjobancá. Chentšana ndocná tonjanobená cha jtsinýenana, Bèngbe Bètsá tbojesanbètšèñe causa. Y Bèngbe Bètsabe uabemana palabrenguine endayana, Bèngbe Bètsá Enócaftaca oyejuayá canjamna ca, ntšamo jtsamèse vojoyenama, y chentšana celoye tbojtsanámbañe. ⁶Pero Bèngbe Bètsabeñe ntsošbuachiyá, ndoñe quenátopodena cha oyejuayá béngaftaca jabemama, er chábioye jobéconamna, entśá jtsemnana jtsosbuáchiyana cha ndegombre bètsemnama, y cha inétsamama chë cha jtsabuatmama tša tmobošèngbiama bètsca tšabe soyènga chamotsebomnama, mo chábiocana uacanana soyèngcá.

⁷Bèngbe Bètsá Noébioye tbojanbuayená uabouana soyènga yochjanopásama, cachora ndopodena jinýama soyènga, y cha Bèngbe Bètsabeñe vojanošbuachéyeca, tojanma

ntšamo Bëngbe Bëtsá tbojanmandacá y barquëshá tojanapormá chabe pamíllanga játsebacama. Cha chca tojanma ora, ošbuáchiyana bómnayeca, cha tojaninýanyé entsánga tša bacna soyënga tmojanmama y chë causa castigánënga jtsemnama yojtsamnama. Chabe ošbuachiyánámnaca Noé tojánashjache Bëngbe Bëtsabe bominýiñe tšabia jtsemnama, y chca entsá jashjáchana, nye Bëngbe Bëtsábeñe jtsošbuáchiyëse.

⁸Bëngbe Bëtsá Abrahámioye tbojanchembo, inýe luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatšetayama luaroye, masque Abraham ndoñe yontsetátšëmbo ndémoye yochjánama. ⁹Bëngbe Bëtsábeñe yojanošbuachéyeca, yojobena mo inýe luarocana ashjanganacá jtсийenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguñe yojoyena, cachá ntšamo chë chábéntšana básenga Isaac y Jacob ibojéftsiyecá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámioye tbojanšbuachenacá. ¹⁰Er Abraham corente uantadá yojanobátmana chë canýe luaroye celoca jamashënguama tempo; chë luare inamna canýe bëts pueblo, puerte tšabe ucuatjoniñe pormana pueblo, canýe luare chë ndayentšama Bëngbe Bëtsá tojanjuabó ntšamo chaotsemnama, y cachabe pormana luare inamna.

¹¹Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canýe šešona chabotsebomnama, masque chora

ya bëtsanánëjema yojtsemna, šešona jtsebomnama. Bëngbe Bëtsá chca tojanma, er Sara corente yojanjuabná, cha chë canýe šešona yochtsanbomnama tbojanšbuachená cha, nyets tempo ntšamo tojayancá amá yojamna ca. ¹²Y chca, quem entsá Abraham, chë šešonga jtsabamnama ya ndobenábentšana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar béjayoca chënyañentša cascajca, ndocná jacúntama ntjobenayana.

¹³Nyetsca quem entsánga imojéftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojanayana quem luarentše chënga imojoyena mo cachëngbe luarentše ndoyëngcá, y quem luarëjana mo nye achñëjuanëngcá ca. ¹⁴Y chca tmojtsichámëngna, puerte jtsinýanýnayana chënga tša imojtseboše inýe luaroca joyénanama, canýe luare cachëngbiamá. ¹⁵Chënga nye chë ndayentšana tmojéftsanbocna luarama manjánjuabnase, matmënjanobená tšabá cachoye jesshéconama. ¹⁶Pero chëngna canýe más tšabe luare inmaboše, canýe luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canýe bëts luare, mo canýe bëts pueblécá chëngbiamá tojanprontá.

¹⁷Bèngbe Bètsá Abrahámbyoye jin'yama, ndegombre a'ñe o ndoñe Bèngbe Bètsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábíoye jètschuayama, ntšamo Abraham chë tojóba bayéngaftaca jamama yojanamancá. Cha Bèngbe Bètsábeñe yojanošbuachéyeca, yojtseprontana chë n'ye can'ye uaquiñá ibnabomná jóbama, Bèngbe Bètsábíoye jètschuayama, masque Bèngbe Bètsá mēntšá tbojanšbuachená: ¹⁸“Chë ácbentšana entsānga n'ye Isaacbiajana mochanjabo ca.” ¹⁹Abraham corente yojanjuabná y yojátatšēmo, Bèngbe Bètsá ndegombre obenana bomná bétsemnama, chë obanēnga chámuatayenama jamama. Chíyeca, Bèngbe Bètsá Abrahámbyoye tbojtsanauyaná Isaac jóbama ora, yojamna mo Abraham obanēnguentšana chábíoye cuaftoyēngacācá. Y chca, ntšamo Isaácaftaca tojanopasacá, batšá yojtsin'yan'ynaye ntšamo Jesucristoftaca yochjanopasacá.

²⁰Isaac Bèngbe Bètsábeñe yojanošbuachéyeca, Bèngbe Bètsábíoye tbojanimpadá chabe uaquiñáatbiama, Jacob y Esaú, bētscá tšabe bendicionēnga chabotsebomnama, chë joshjanguama tempēnga ora.

²¹Jacob Bèngbe Bètsábeñe yojanošbuachéyeca, ya jóbana ora, tbojanimpadá cada ona chë Josebe básengbiana, Bèngbe Bètsá chaoma bētscá tšabe bendicionēnga chamotsebomnama. Cha chca tojanma, jotsejbénase Bèngbe Bètsábíoye jadórana, y chabe jatjonēfjiñe tshanánoca jojuáchase.

²²José Bèngbe Bètsábeñe yojanošbuachéyeca, ya jóbana ora, tojánayana más chcoye

chë Israeloca entsānga Egipto luarentšana mochjéftsanbocna ca, y tojéftsanmandá ndayá jamana chabe óbana cuérpoca.

²³Moisesbe bētscétsata Bèngbe Bètsábeñe ibojanošbuachéyeca, cha tojanon'yná ora, unga shin'yēntscuana cha tmojtsaniytēme, er chata tbojánin'ye cha can'ye botamana bāsetema bétsemnama, y ndoñe tbonjanēuatjaná chë reybe mandama, chë n'yetsca judiēngbe basetēmēnga boyabāsetemēnga jtsébáyana.

²⁴Moisés Bèngbe Bètsábeñe yojanošbuachéyeca, ya bētscá yojtsemna ora, ndoñe tonjánbošena chë Egiptoca reybe bembēbe uaquiñacá chamotsábuatmama. ²⁵Chamna, tojánbošena cha jasúfriama ín'yēnga chamotsamama, cán'yiñe chë Bèngbe Bètsabe entsāngaftaca, y ndoñe n'ye baseftayté tšabá jatsmēnana, bacna soyēnga jtsamēse, ntšamo cachá tojtsejuabnacá, n'ye cachá tšabá jtsomñama. ²⁶Chamna, cha yojanjuabná, chë padecena soyēnguiñe jasúfriana ntšamo Cristo tojansufricá, más tšabá yojamna chë Egiptoca uámana soyēngama, er cha Bèngbe Bètsábeñe jtsošbuáchiyēse chábeñe yojanobátmana, ba tšabe soyēnga mo can'ye uacanana soycá cha ibochjanatšetayama.

²⁷Bèngbe Bètsábeñe yojanošbuachéyeca, Moisés Egiptocana tojéftsanbocna, chë luarentša rey cháftaca chábuetnama ntjatauatjca. Cha ainaniñe n'yets tempo añemo yojtsebomna, y chca yojánin'ya mo chë ndocná jin'yama tondobenacá, Bèngbe Bètsábíoye cuaftsonyáca. ²⁸Bèngbe Bètsábeñe yojanošbuachéyeca, ntšamo Bèngbe Bètsá tbojanmandacá, Moisés chë judiēnga tojanabuayená Bashco fiesta

jamama, y chë Israeloca entsángaftaca yebnëngoye amashjuaniñe buñeca tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaqiñënga ndocá chaondámama.

²⁹ Moisés y Israeloca entsanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuafstomñcá; chentšana, chë Egiptoca entsanga cachcá jamama tmojánbošena ora, nyetscanga chiyiñe tojtsanatajo.

³⁰ Israeloca entsanga Bëngbe Bëtsábeñe imojanošbuachéyeca, chë Jericó bëts pueblentša tapišënga shéconana canýsëfta tentscuama chënga imojánajntensana, chëšënga yojtsáshajaye.

³¹ Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínýengaftaca, chë bëts pueblentse oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entsanguentsana ichmónënga tšabá tojanébuaja, chë jarrepárama tmojánanga ntšámose chë luarentse oyenënga jáyëñjanama jobenayama.

³² Atše sentsobena bangbiama más jóyebuambayama, Bëngbe Bëtsábeñe ošbuáchiyëngbiama, pero luare šattsëshbe chcangbiama jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambayëngcá. ³³ Chënga Bëngbe Bëtsábeñe imojanošbuachéyeca ínýengbe mandadëngbe entsángbioye tmojanayëñjaná, bëtscá imojánama nyetsca entsángaftaca ntšamo tšabá yomncá jtsamama y nyetscanga cachcá chamotsámanama, ndayá Bëngbe

Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsëmna ora, chënga chamuatenáyebengoma, chentšana báseftangbioye ndocá chamondámama. ³⁴ Ošbuáchiyana bómnyeyeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadéjaca jobanámentšana; ya tondaye añemo béntsebmna ora, Bëngbe Bëtsá tojanma bëts obenana y puerte añemo chamotsebmnama; tmojánashjache bëts obenana jtsebmnama ínýenga jáyëñjanama, chëngaftaca imojtsentsjaná ora; y tmojanobená ínýe mandadënga y chëngbe soldadënga jáyëñjanama, chamotsachetama jamëse.

³⁵ Ošbuáchiyana bómnyeyeca, básefta shembásenga chëngbe óbana pamíllangbioye cachiñe ainënga tmojtananýe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeyeca, ínýenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nyetsca tescama yomna tšabe vida jtsebmnnana, y ndoñe nýe chë jótsbocana batsatema más vida jtsebmnnama.

³⁶ Ošbuáchiyana bómnyeyeca, ínýenga corente tmojansufrí, ínýenga chëngbioye tmojanoyánguango ora y tmojanatsetšená ora; y ínýenga tmojansufrí y cárceloye cadenëjuangaca utámenënga joquédamnaca. ³⁷ Inýengbioye ndëtšbéngaca tmojtsanatëchénganja, serruchéshaca tmojtsanätëjtacacaye, espadéjaca tmojtsanëbaye. Inýenga imojánajna cánýentšana ínýecnoye

nÿe oveshá y chivêbe bobáheca uichétjonènga, ujabótènga, ainana tsetšanènga, y ínÿengbeyeca mocá borlánènga. ³⁸ Chè nÿe quem luarama enójuabnayènga ndoñe monjanomerecena chènga méngaftaca jtsiyenama, chènga chè vida imojábomna cánÿentšana ínÿecnoye aniñe, entšanga ndoyena luarènguenache, tjañenache, fshantsiñe atèbèfjniñe y cuevèshènguiñe.

³⁹ Nÿetsca quem entšanga, ndèmuanyèngbiana muentše tmonjoyebuambá, Bèngbe Bètsá tšabá chèngbiana tojánayana, ošbuáchiyana imojánbomna ca; pero ni canÿa chènguentšá tonjanóyèngacñe, ndayá Bèngbe Bètsá chèngbe entšanga jatšatayama tojanašebuachenacá, nÿetsca tescama jtsebomnama.

⁴⁰ Bèngbe Bètsá, bèngbeñe jtsejuabnayèse, tojanjuabó canÿe más tšabe soye bèngbiana jamama, chca, Bèngbe Bètsá canÿe ora jamama, bènga nÿetscanga, chènga y bènga chamotsemnama lempe ntšamo Bèngbe Bètsá yobošcá, ntšamo Bèngbe Bètsá tojanašebuachenacá jóyèngacñe.

Bènga mochtsejuabnaye ndayá Jesús tojanmama

12 ¹ Chíyeca, bènga mochtsejuabnaye ba entšangbiana, chè bèngbiana más natsana imojaniyenènga, ndèmuanyènga puerte tšabá bènga jtsinÿanÿnayana ntšamo ndegombreyomnana Bèngbe Bètsábeñe ošbuáchiyana jtsebomnana, mo chènga ndayá bènga tmojtsamama cuaftsonÿangcá. Chcasna, mo chè tmochamanèngcá, ínÿengaftaca jenèÿénjanama, chè jashjanguama tojtsemna luaroye natsana jashjanguama, chènga jotjajuamna,

chè chorscama nduaservena entsáyá jtsenátsejcana, y lempe ndayá tojtsama más uenana chamotjajuama soyèngnaca jtsenójacana; bèngnaca cachcá, ndoñe matjaleséncia bènga Crístbioye ndoñe tšabá ndètsooservénama, ni chè bacna soyènga jamama juabnènga, chè bèngbioye paselo jáÿénjanama juabnènga cachcá chamotsamama. Chamna, šontsamna sempre Bèngbe Bètsá jtserervénana, puerte uantadènga jtsemnèse masque padecena soyènguiñe tmoyna, bènga chamobená chè trabajo jamama, chè ndayama Bèngbe Bètsá šojáchembo. ² Jesusbiana mochtsejuabnaye, nda šuebènatsana bènga ošbuáchiyana chamotsebomnama, y šuinÿanÿná ntšamo nÿets tempo nÿetsca soyènguiñe Bèngbe Bètsábeñe jtsošbuáchiyama. Cha chè cruzoca jóbanama sufrínana lempe tojanoboyá, er cha yojanobátmana chè chentšana yochtsanbomna bèts oyejuayánama; y yojanjuabná, chè más bacá uamana entšangcá jóbanana, chabiana ndoñe canÿe uamana soye yonjamna ca; y chentšana chè uamana puestentše tojtanótbema, Bèngbe Bètsabe catšbioica, jtsemándayama.

³ Chíyeca, šmochtsejuabnaye ntšamo Jesús Bèngbe Bètsábeñe jtsobátmanèse, puerte uantado yojamnama, chè bacna soye amènga corente chabe contra imojtsemna ora. Chca chábeñe šmochtsejuabnaye, tšèngaftanga Crístbiana oservéniñe ndoñe chacmondèumantšema, ni ainaniñe añemo jtsebomnana ndoñe chašmondájbanama. ⁴ Tšèngaftanga padecena soyènguiñe šmojachnèngo, entšanga bacna soyènga imojtsama causa, pero méntsoñama ndoñe cmontsamna jóbanama, Crístbe

soyëngama enojuerzániñe; ⁵ y tcmojtsébnëtjomba ndayá Bëngbe Bëtsá tsëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguine mëntśá endayana:

Atśbe uaqiñá, Bëngbe Utabná aca jábuayenama tojtseboşe ora, aca jasúfriase y padecena soyënga jauántase, chora ndoñe catjátsjuabnaye chiñe mo canye nduámana soye cuaftsemncá; y cha chacmojuácacana ora, ndoñe cattsjabaná ainaniñe añemo jtsebmomnana.

⁶ Er Bëngbe Utabná jábuayenana nda cha tbobobonshanábioye, y jacastígana chë mo chabe uaqiñacá tbojofjábioye ca —chiñe endayana.

⁷ Padecena soyënguine chaşmojtseufrina ora, şmochtsejuabnaye chë soye yojtsemna tsëngaftangbioye jábuayenama, y chca, Bëngbe Bëtsá tsëngaftangaftaca jtsamana mo chabe básenga quetsomñecá. ¿Nderado nántsemna canye uaqiñá, y chábioye chabe taitá ndocna te buanjuácacana, más tsábá chaotsamama? ⁸ Nderado Bëngbe Bëtsá tsëngaftanga ndoñe tcmonjabuayená, ntşamo nyetsca chabe básengaftaca cha endbetsamcá, as tsëngaftanga ndoñe ntsemnana ndegombre chabe básenga. ⁹ Y bënga básenga monjamna ora, bëngbe bëtsétsanga quem luarentşe monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más şontsamna, jtsobedecánana y más bëts respeto jtsebmomnana celoca Bëngbe Taitabiama, nda tojama entşanga espíritu chamotsebmomnana, y chca,

bënga tsabe vida chamotsebmomnana.

¹⁰ Bëngbe bëtsétsanga quem luarentşe, nye bášefta tescama, bënga jëftsabuayinyana, y chca jamana chënga tsábá tojtsinyana ora; pero Bëngbe Bëtsá bënga şojtsabuayiná ora, sempre chca jtsamana bëngbe tsábiamama, bënga chabe entşanga jábiamama, cachacá puerte tsábanga, ntşamo cha nyets tempo yomncá.

¹¹ Sempre bënga ndaye castigo tmojtsebmomna ora, chora bënga chama ndoñe oyejuayënga ntsemnana, pero añe cochtsetşenánënga. Pero bënga chë castigüentsana tmojuatsjinye ndayá Bëngbe Bëtsá chë sóyeca tbojtsabuayinacá, as chentşana jóbocnana natjëmbana oyenana, nyetsca soyënguine ntşamo tsábá yomncá jtsamëse.

**Bëngbe Bëtsábioye
jtsabotena, entşangbiamama
ndoñe tsábá ntsemnana.**

¹² Mo nda puerte uamëntşnayacá, jatrabájama tondaye añemo ntjtsebmomncá, tsátşena buacuatsëngaca y puerte uamëntşena ntsamiasëngaca, tsëngaftangbentşe bášeftanga ya uamëntşnayënga şmojtsemna Bëngbe Utabnabiama trabájayíñe, y ainaniñe ndoñe añemo şmontsebmomna. Cachiñe bëts añemo şmochtishache, y Bëngbe Bëtsabe obenana cachiñe şmochtsatsbmomna. ¹³ Mo chë canye benache tsábá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tsábá jtsatanama chamuatatsjinyama, y chë benachentşana ndoñe chamondëtsebmocanama; cachcá tsëngaftanga, chë bëtscá oşbuáchiyana y Cristo jaserviama corente añemo şmobomnënga, chë nye batsatema

ošbuáchiyana y chca jatrabájama nýe tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinýañiyëse, y ntjalesenciácá ndocna soye chaotsama chë tšabe benachentsana tšëngaftanga chašmotsojuánañama.

¹⁴ Lempe ntšamo chašmojobenacá šmochjama nyetscángaftaca natjémbana jtsiyenama, y ntšamo Bëngbe Bëtsabe entsanga mondbetsamcá jtsamëse chašmotsiyenama, cha jtseservénëse; er chca ntjamcá, canýa ndoñe ntsobenana Bëngbe Utabnábioye jinýama. ¹⁵ Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entsángbioye yochjatšataye tšabe soyënga chënga ndoñe chamondashjache. Šmochtsantješna, tšëngaftanguentše ndocná chaondëtsemna, mo canýe untja tbëtëjácá, chë chcaja sayëngbioye jásoçayana, nda chaotsama, ínýenga natjémbana ainana ndoñe chamondëtsebonnama y bacna soyënga jtsamëse chamotsiyenama. ¹⁶ Yejuana šmochtsantješna ndocná tšëngaftanguentše shembása o boyabásaftaca bacna soye amá chaondëtsemnama, ni canýa ndabiama Bëngbe Bëtsabe soyënga tondaye chaondëtsámama. Esaú chca tojanma, chë lempe yochjanashjachcá, mayor uaqiñá bëtsemnama, chabe uabentsábioye canýe šcnena sanama tbojtaname ora. ¹⁷ Y tšëngaftanga šmondëtátšëmbo, chca tojanopasá chentsána, Esaú tojánbošena chabe taitá Bëngbe Bëtsábioye chaboimpadama, chabiama tšabe bendicionënga chaomama, chë mayor uaqiñá bëtsemnama yojanobena

jtsebonnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

¹⁸ Tšëngaftanga ndoñe chešmatobeconá, mo chë entsanga Israeloca Sinái ca uabaina tjoye tmojanobeconacá, ndayá chënga imojobena jabojuuama, y íñeshca yojtsángbototjuana, tondaye binýniñe luare, tša ibetiñe y puerte jabuache binýiëngaca; ¹⁹ ni chešmatuena chëngcá, canýe trompetéjjuua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama. ²⁰ Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canýe bayá chaotsomñe, entsemna chana ndëtšbéngaca chamotsatëchënjanga jtsóbama ca.” ²¹ Ndegombre, ntšamo tmojaninýcá tša uabouana yojtsemna, cach Moisésnaca mëntšá tojánayana: “Tša šontsengmëmná auatjananá séntsemna causa ca.”

²² Pero tšëngaftanga Bëngbe Bëtsábioye šmojobeconá, y chca endmëna mo tšëngaftanga canýe Sión ca uabaina tjoye celoca cuafjobeconacá, chë Bëngbe Bëtsá nyets tempo vida bonnabe bëts puebloye, mo celoca Jerusalén cuenta; y ba uaranga angeléngbioye šmojobeconá, cánýiñe oyejuayënga enefjuanënga imojtsemnéngbioye, Bëngbe Bëtsá jtsatschuanayama. ²³ Endmëna mo

tšëngaftanga chë Bëngbe Bëtsabe entšángbioye cuafjobeconangcá, chentšë enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jóyëngacñama, ndëmuanÿenga Bëngbe Bëtsá chabe librëšañe tojúbiam. Tšëngaftanga šmojobeconá Bëngbe Bëtsábioye, ntšamo nÿetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tšëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëtsiyenëngbe espiriténgbioye, chë entšanga ndëmuanÿengbiam Bëngbe Bëtsá tojanma chamotsemnama lempe ntšamo chabe entšangbiam yojanjuabnacá, chca, cháftaca sempre vida jëftsebomnama. ²⁴Tšëngaftanga Jesúsbioye šmojobeconá, chë jóbanëse, entšanga Bëngbe Bëtsáftaca mo canÿacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiam cha tojanóbana ora tojanábuashana buiño ye tšëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuéscacjama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tšabe soyënga jashjáchana; Jesúsbe buiñeca, bënga montsobena atsebácanënga jtsemnama.

²⁵Cuedado šmochtsebomna, bëngbioye tojtsoyebuambná ora cha joyeunayama. Chë Israeloca entšanga

ndoñe tmonjánbošena Bëngbe Bëtsá joyeunayama, chë Sinaí tjoca quem luarentšë tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiyayá, ndoñe cachcá ndëcastigánënga quešochátabashejuana, ntšamo cha šojtsëtsësnacá ndoñe tmontseyeunanëse. ²⁶Bëngbe Bëtsá Sinaí tjoca chë entšángbioye tojanoyebuambá ora, chabe oyebuambnayánaca tojanma quem luare chauangmëmanama, pero mora cha chabe uabemana palabrénguiñe tojašebuachená: “Atšë cachiñe chanjatsma chauangmëmanama, ndoñe nÿe quem luare, sinó celócnaca ca.” ²⁷Bëngbe Bëtsá “cachiñe ca” tojánayana ora, chë sóyeca yojsichamo, chë ndayté lempe chaongmëmanama cha cachiñe yochjama ora, chë quem luarentšë tmojama soyënga y chë jatrócama yopodena soyënga yochtsejuána ca, chca, nÿe chë nÿetsca tescama yomna soyënga y ndoñe jatrócama soyënga chaoquedama. ²⁸Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nÿetsca tescama y ndocna te ntjotrócana. Bëngbe Bëtsá chama mochjëtshuaye, y ntšamo cha tšabá tbojtsinÿancá mochtsadorana, chabiam bëtš respeto jtsebomnëse, y nÿetscangbiam más bëtš cha yomnama jtsejuabnayëse. ²⁹Er Bëngbe Bëtsá puerte etonaná chë chabiam nduauenanënga jabuache echanjácastigaye, y chca, cha jtsemnana mo canÿe iñeshe lempe jtsepochoacamcá.

Ntšamo jtsiyenama, Bëngbe Bëtsá oyejuayá bëngaftaca chaotsemnama.

13 ¹Sempre nÿetscanga šmochtsebobonshana,

Jesucristbeyeca catšátanga quetsomñecá. ² Sempre tšabá chë tšëngaftangbe yebnoye inye luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanébuaja.

³ Chë utámenëngbiama sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿenga tmojtsama chamotsesufrinëngbiama šmochtsenójuabnaye, er tšëngaftángnaca nderado cachcá šmatjatspása.

⁴ Boyabása y shembása tbojanobouamá ora, ntšamo tbojanenšbuachenacá nÿetscanga chamotserrespetana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayéngnaca.

⁵ Ndoñe šmattsiyena jtsejuabnayëse nÿe mallajta crocénana jëftsebomnama. Nÿe chë šmombna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.” ⁶ Y chca, bënga montsobena corente añémoca jayanama:

Bëngbe Utabná endmëna nda atšë šonduájabuachana; tondayama quichátauatja.

¿Ndayá canÿe entšá nanjobenaye átšëftaca jamama ca?

⁷ Tšëngaftangbe amëndayëngbiama, chë Bëngbe Bëtsabe buayenana soyënga tcmojábuatambangbiama, sempre šmochtsenójuabnaye. Sempre šmochtsenójuabnaye chë ntšamo

chënga imojaniyenentšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnama.

⁸ Jesucristo cachá nÿets tempo iuétsemna, tempo, mora y nÿetsca tescama. ⁹ Ndoñe šmatjaleséncia ínÿenga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiama yobómnayeca, y ndoñe chë sanama, chë ndayá aíñe o ndoñe šontsamna jtseyayana soyëngama mandënga tcojtsamëse. Chca mandënga ndocna te chë Israeloca entšangbiama tempo tonjanoservé.

¹⁰ Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnama. Bënga mondbomna chë Jesucristo bëngbiama tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbocna tšabe soyënga. ¹¹ Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuaperdonama, y chë bayëngbe cuerpënga jtsejuinÿiyana entšangbe tmoyena luarentšana chaboca. ¹² Cachcá, Jesúsna tojansufrí y

tojanóbana bêts pueblentsana chaboca, chabe buiñe tojanábuashana ora jóbanëse, entsanga Bëngbe Bëtsábenga chamotsemnana, y chabe delante mo tšabengcá chamotsemnana.

¹³ Chíyeca bënga šontsamna Jesúsbioye jobéconana, nda entsanga tmojtsanaboté y bêts pueblentsana chaboca tojanóbana. Cha mochjuasto, y ntšamo cha tojansufricá béngnaca mochjasúfria. ¹⁴ Er quem luarentše bënga ndoñe quemátsbomna canye bêts pueblo bëngbiama, nyets tempo chauesomñe bêts pueblo, ndayá bënga tša mondoño y puerte mondobátmana bënga joyéanama chë celoca yochtsemna Bëngbe Bëtsabe bêts pueblentse. ¹⁵ Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canye soye cuafjuatšëmboncá. Chcasna, jtsóyebuambnayëse cha mochtsadorana. ¹⁶ Sempre ntšamo tšabá yomncá šmochtsama, y chë šmobomncá inyëngbiámna chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiama tcojama ca, y jtsinynana bënga Bëngbe Bëtsá imojtsatschuanama, ndayá cha tojamama.

¹⁷ Sempre šmochtsama ntšamo chë tšëngaftanga ošbuachiyëncá enefjuanéngbeñe amëndayënga tmojayancá, y sempre šmochtsiyena jtsamëse nye ntšamo chënga tmojtsebošcá. Chënga sempre tšëngaftangbioye jtsanýenana, tšëngaftangbe tšabiama, ntšamo cmojánanyenama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse, šmochjama chënga chëngbe

trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

¹⁸ Bëngbe Bëtsá bëngbiama šmochtseimpadana, er bënga ainaniñe corente fsëndétatšëmbo tšabá tifjamama, y tša fséntseboše jtsiyenana ntšamo tšabá yomncá lempe jtsamëse. ¹⁹ Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciama tšëngaftangaftaca cachiñe jtsatsmënama.

**Bëngbe Bëtsábioye chëngbiama
jaimpádama y chënga jacheuayama**

²⁰ Atše, Bëngbe Bëtsá séntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánýena mo oveshëngbe tšabe abujënyácá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entsanga jinýanyiyama ndegombre bëtsemnana ntšamo Bëngbe Bëtsá chabe entsangbiama tojanašebuachenacá nyetsca tescama jamama. ²¹ Cha séntseimpadana chaoma tšëngaftanga chašmotsebomnama nyetsca tšabe soyënga ntšamo cmojtsëjbotcá, chca, lempe ntšamo cha yobošcá tšëngaftanga chašmotsamama; y cha Jesucristoftaca chaboma béngaftaca ntšamo cha tšabá tbojtsinýancá. inýetscanga nyetsca tescama Cristo chamotsatschuaná! Chca chaotsemna.

²² Jesucristbeyeca catšátanga, tšëngaftanga cbontsaimpadana, jábuayenama ntšamo tcbonjauyancá,

puerte uantádoca tšabá
 chašmóyëngacñama, er nÿe básefta
 palabrëngaca chama tçbonjubuábiama.
²³ Atše séntseboše tšëngaftanga
 chašmotsetátšëmbo, Timoteo
 Jesucrístbeyeca bëngbe catšata, ya
 ndoñe utamená yontsemnama, y cha
 betsco átšbioye chaojtabëse, átšeftaca
 chanjëftsbetše tšëngaftanga jányama
 chajá ora.

²⁴ Tšëngaftanga ošbuachiyëngbeñe
 nÿetsca amëndayënga šmochjácheuaye,
 y nÿetsca Bëngbe Bëtsabe entšágnaca
 choca. Chë Italia luaroquënga
 ošbuáchiyënga tšëngaftanga
 cmontsacheuaná.

²⁵ Atše, Bëngbe Bëtsá
 séntseimpadana, cha chaoma tšabe
 bendicionënga tšëngaftangbeñe
 chaotsemnama.